



Udruženje „Sindikat radnika u zdravstvu u Kantonu Sarajevo“  
Obala Kulina bana 1, 71000 Sarajevo, Bosna i Hercegovina

Broj: 331/21  
Sarajevo, 11.08.2021. godine

**Predmet: Saopštenje o toku pregovora u vezi novog Granskog Kolektivnog ugovora o pravima i obavezama poslodavaca i radnika u oblasti zdravstva za područje Kantona Sarajevo**

Poštovane kolegice i kolege, članovi Sindikata radnika u zdravstvu u Kantonu Sarajevo,

Obavještavamo Vas da na sastanku pregovaračkih timova Sindikata radnika u zdravstvu u Kantonu Sarajevo i Vlade Kantona Sarajevo, održanom 11.08.2021. godine nije postignut nikakav dogovor, niti pomak u vezi pregovora za novi Granski Kolektivni ugovor o pravima i obavezama poslodavaca i radnika u oblasti zdravstva za područje Kantona Sarajevo (u daljem tekstu: Granski kolektivni ugovor). Iako smo na prethodnom sastanku predložili, a Pregovarački tim Vlade Kantona Sarajevo prihvatio da se izjasni o tri neusaglašena pitanja koja glase:

1. da li u nazivu Granskog kolektivnog ugovora da stoji riječ „granski“;
2. da dostave svoj prijedlog koeficijenata za svaku grupu složenosti poslova koja je propisana dostavljenim im prijedlogom Granskog kolektivnog ugovora i
3. da se izjasne o datumu početka primjene Granskog kolektivnog ugovora,

na današnjem sastanku nismo dobili izjašnjenje Pregovaračkog tima Vlade Kantona Sarajevo o gore navedenim pitanjima.

Umjesto izjašnjenja i prijedloga koeficijenata grupa složenosti poslova, Pregovarački tim Vlade Kantona Sarajevo je istakao da se ne slaže s tim da imamo tri neusaglašena pitanja jer ima još nekih izmjena koje su sporne i koje su tehničke prirode zbog čega se ne trebaju nalaziti u Granskom kolektivnom ugovoru, te da se u skladu sa sredstvima Zavoda zdravstvenog osiguranja Kantona Sarajevo predvidi samo povećanje koeficijenata medicinskom kadru i to ne onako kako je predložio ovaj Sindikat već ono što se može shodno finansijskim sredstvima Zavoda zdravstvenog osiguranja Kantona Sarajevo dok za nemedicinski kadar nema povećanja koeficijenata. Na kraju su izjavili da ukoliko prihvatimo taj prijedlog, zamoliće Zavod zdravstvenog osiguranja Kantona Sarajevo da pripremi ponudu koliko je to sredstava. Dakle, Pregovarački tim Vlade Kantona Sarajevo je i dalje stava da se koeficijent složenosti poslova treba povećati zdravstvenim radnicima, i to ne u iznosu kako traži Pregovarački tim Sindikata radnika u zdravstvu u Kantonu Sarajevo, već prema „onome što mogu“ dok na povećanje koeficijenta nezdravstvenim radnicima ili kako ih nazivaju „administracija“ ne pristaju jer imaju veće plaće od administracije u drugim sektorima. I na ovom sastanku, kao i na svim prethodnim, Pregovarački tim Vlade Kantona Sarajevo nije dao konretan prijedlog koeficijenata niti za jednu grupu složenosti poslova, nije bilo izračuna potrebnih sredstava po njihovom prijedlogu koeficijenata složenosti poslova već bi se to trebalo tek računati, tako da se ne možemo otići utisku da predstavnici poslodavaca, odnosno Vlada Kantona Sarajevo, njen pregovarački tim i resorno ministarstvo nisu zaista zainteresovani za postizanje dogovora u vezi novog Granskog kolektivnog ugovora.

Na insistiranje Pregovaračkog tima Sindikata radnika u zdravstvu u Kantonu Sarajevo da Pregovarački tim Vlade Kantona Sarajevo ispoštuje raniji dogovor i dostavi izjašnjenje o dostavljenom im prijedlogu Granskog kolektivnog ugovora, ministar zdravstva Kantona Sarajevo,

tel/fax: 033 667 287, mob: 062 933 674

www.sindikatzdravstvaks.ba; e-mail: sindikatzdravstvaks@hotmail.com  
ID:4202158440004; TRN: 134460100009367 ASA banka d.d. Sarajevo



Udruženje „Sindikata radnika u zdravstvu u Kantonu Sarajevo“  
Obala Kulina bana 1, 71000 Sarajevo, Bosna i Hercegovina

prof. dr Haris Vranić je istakao da će u roku od 7 do 10 dana od današnjeg sastanka dostaviti prijedlog Granskog kolektivnog ugovora Pregovaračkog tima Vlade Kantona Sarajevo. U konačnici to znači da u periodu od 18. do 21. augusta 2021. godine trebamo zaprimiti prijedlog Pregovaračkog tima Vlade Kantona Sarajevo kako je ministar Vranić i obećao, a to znači da konačno dobijemo zvaničan prijedlog Pregovaračkog tima Vlade Kantona Sarajevo kako o koeficijentima složenosti poslova za sve grupe poslova, tako i o datumu početka primjene Granskog kolektivnog ugovora. Po prijemu prijedloga Granskog kolektivnog ugovora Pregovaračkog tima Vlade Kantona Sarajevo bićete blagovremeno obavješteni, kao i o daljim sindikalnim aktivnostima.

Iskoristićemo ovu priliku da Vas informišemo da čvrsto vjerujemo da ne stoje izjave svih dosadašnjih Pregovaračkih timova Vlade Kantona Sarajevo, pa i aktuelnog sastava Pregovaračkog tima Vlade Kantona Sarajevo da Zavod zdravstvenog osiguranja Kantona Sarajevo nema potrebna finansijska sredstva za prihvatanje prijedloga koeficijenata složenosti poslova kako traži ovaj Sindikat. Navedeno potvrđuje i činjenica da je prije par dana Vlada Tuzlanskog kantona potpisala kolektivni ugovor za oblast zdravstva za područje ovog kantona, povećavajući plaće svim radnicima u zdravstvu, kako zdravstvenom kadru, tako i nezdravstvenom kadru, a za čiju primjenu će na godišnjem nivou biti potrebno ukupno 10,7 miliona KM. Usporedbe radi iznosimo sljedeće podatke:

- Ukupna sredstva prema Finansijskom planu Zavoda zdravstvenog osiguranja Kantona Sarajevo za 2021. godinu („Službene novine KS“ broj: 17/21) iznose 484.051.000,00 KM, a ukupna sredstva prema Finansijskom planu Zavoda zdravstvenog osiguranja Tuzlanskog kantona za 2021. godinu iznose 281.455.110,00 KM, dakle manje za 202.595.890,00 KM u odnosu na Zavod zdravstvenog osiguranja Kantona Sarajevo;
- Budžet Kantona Sarajevo za 2021. godinu („Službene novine KS“ broj: 5/21) iznosi 974.200.500,00 KM, a Budžet Tuzlanskog kantona za 2021. godinu („Službene novine TK“ broj: 1/21) iznosi 414.802.549,00 KM, dakle manje za 559.397.951,00 KM u odnosu na Budžet Kantona Sarajevo;
- Prema podacima Federalnog zavoda za statistiku, ukupan broj stanovnika u Kantonu Sarajevo na dan 30.06.2020. godine iznosi 421.555, a u Tuzlanskom kantonu 437.607. Broj nezaposlenih osoba u Kantonu Sarajevo sa decembrom 2020. godine iznosi 63.496, a u Tuzlanskom kantonu su 76.878 nezaposlene osobe. Prosječna neto plaća u Kantonu Sarajevo za april 2021. godine iznosi 1.238,00KM, a za isti mjesec u Tuzlanskom kantonu 893,00 KM. Prosječan broj zaposlenih u djelatnosti zdravstvene i socijalne zaštite (Q) u 2020. godine u Kantonu Sarajevu je 10.400 sa prosječnom neto plaćom od 1.475,00 KM, dok je u Tuzlanskom kantonu u istoj djelatnosti zaposlenih 6.830 sa prosječnom neto plaćom od 1.371,00 KM.
- Prema podacima Federalnog ministarstva trgovine cijene proizvoda i usluga su daleko jeftinije u Tuzlanskom kantonu u odnosu na Kanton Sarajevo.

Imajući u vidu gore navedene podatke, a posebno činjenicu da su sredstva Zavoda zdravstvenog osiguranja Kantona Sarajevo za 2021. godinu skoro pa duplo veća u odnosu na sredstva Zavoda zdravstvenog osiguranja Tuzlanskog kantona, tačnije veća su za 202.595.890,00 KM, jasno je da su netačni navodi Pregovaračkog tima Vlade Kantona Sarajevo o nedostajućim sredstvima u Zavodu zdravstvenog osiguranja Kantona Sarajevo za prihvatanje prijedloga koeficijenata složenosti poslova kako je predložio ovaj Sindikata. Ne može opravdanje biti ni veći broj zaposlenih u djelatnosti zdravstva u Kantonu Sarajevo u odnosu na Tuzlanski kanton budući da

tel/fax: 033 667 287, mob: 062 933 674

www.sindikatzdravstvaks.ba; e-mail: sindikatzdravstvaks@hotmail.com  
ID:4202158440004; TRN: 1344601000009367 ASA banka d.d. Sarajevo



Udruženje „Sindikat radnika u zdravstvu u Kantonu Sarajevo“  
Obala Kulina bana 1, 71000 Sarajevo, Bosna i Hercegovina

se u Kantonu Sarajevo plaće doktorima medicine i stomatologije isplaćuju još od novembra 2019. godine po koeficijentima koje traži ovaj Sindikat tako da su ta sredstva već predviđena u pomenutom zavodu što znači da je potrebno izdvojiti sredstva za ostale profesije u zdravstvu izuzev doktora, za razliku od Tuzlanskog kantona gdje su se potpisivanjem kolektivnog ugovora morala izdvojiti sredstva za sve profesije radnika u djelatnosti zdravstva.

Da zaključimo, ne postoji objektivan i opravdan razlog da se ne potpiše Granski kolektivni ugovor kako je predložio ovaj Sindikat, a kojim će se regulisati radno – pravni status i koji će donijeti poboljšanje materijalnog statusa radnika u zdravstvu u Kantonu Sarajevo. Pitanje je da li postoji politička volja ili se radi o inatu i samovolji dvije osobe. Politička volja očito ne postoji, jer kada je jedan kanton sa skoro duplo manje sredstava u zavodu zdravstvenog osiguranja, sa većim brojem stanovnika, a samim time i većim brojem korisnika zdravstvenih usluga, te većim brojem nezaposlenih osoba što za posljedicu ima i manje uplate doprinosa na ime zdravstvenog osiguranja, izdvojio finansijska sredstva za kolektivni ugovor čija vrijednost na godišnjem nivou iznosi 10,7 miliona KM bez smanjenja kvaliteta zdravstvene zaštite građanima, zašto to ne želi i neće da uradi i Vlada Kantona Sarajevo čiji Zavod zdravstvenog osiguranja Kantona Sarajevo raspolaže sa ukupnim sredstvima za tekuću godinu od 484.051.000,00 KM.



Predsjednik  
Prim. dr. Edo Belimić

Dostavljeno:

- Članovi Glavnog odbora Sindikata radnika u zdravstvu u Kantonu Sarajevo
- Mediji
- [www.sindikatzdravstvaks.ba](http://www.sindikatzdravstvaks.ba)
- a/a

tel/fax: 033 667 287, mob: 062 933 674

[www.sindikatzdravstvaks.ba](http://www.sindikatzdravstvaks.ba); e-mail: [sindikatzdravstvaks@hotmail.com](mailto:sindikatzdravstvaks@hotmail.com)  
ID:4202158440004; TRN: 1344601000009367 ASA banka d.d. Sarajevo